

欽定剿平三省邪匪方略

欽定判平三省邪匪方畧正編卷四十六

丁巳年

八月初三日

己亥

蔣兆奎奏言

臣

欽奉

諭旨命於省北標營內派兵二千名赴豫查前准景

安來咨奏調晉兵一千赴河北防守當將本年

夏間挑赴洛陽防守兵一千名轉飭卽日兼程

來省赴豫今豫省需兵緊急

臣

已飛咨大同鎮

再派一千名接踵前來迅速赴豫聽候景安調

撥

同日伊江阿奏言臣於七月二十七日接奉

諭旨命於附近營分照景安所調兵數派委將備帶
領赴豫前接景安來咨業於相近之兗州等處
各營挑選壯健兵一千名又於登州鎮所屬之
青州等處抽撥壯健兵五百名共派兵一千五
百名并揀委曾經出師之署膠州營副將培德

遊擊洪德都司梁煥吳經國選帶強幹員弁管
領分作七起限於八月初二日第一一起起程初
四日即可入河南界其餘各兵接連前進趕赴
南陽交景安調撥其有剿均奏入報

聞

同日

上諭內閣口現在吉林官兵已經賽冲阿帶領到京

其黑龍江官兵亦已陸續可到尙無大員帶領圖
桑阿著賞給三等侍衛卽著與烏爾圖那遜分帶
黑龍江官兵前往軍營奮勉立功

初四日庚子景安奏言臣自抵新野籌辦各事宜

後復思漢江南北兩岸均係湖北地面距豫省
邊界遠近不一臣慮兵力現在祇數百名若分

設沿江亦不過防守二三十里而漢江東西綿

亘數百里斷難處處周密惟湖北光化縣之老
河口人烟稠密爲上下船隻聚集之所

臣當囑

張文奇帶兵七百名馳赴該處沿江防守但賊

匪狡獪異常必窺視無兵之處偷渡

臣再四思

維惟有沿江本地鄉勇防守本境伊等各顧身
家較爲得力總須地方官多爲募集於江岸處
處設卡星羅碁布多樹旗幟嚴備鎗礮以杜賊

人覬覦之念當嚴飭襄陽道府率同沿江各州縣妥爲辦理至

臣

所帶標兵四百名分撥新野

鄧州淅川防守城池尙屬不敷卽於現募鄧淅防邊鄉勇內酌帶二千名前赴湖北光化江岸適中之地擇要駐劄以壯聲勢再保康房縣南漳均有賊匪分股滋擾王文雄帶兵一千名現由南漳前進未免難以兼顧

臣

俟山西兵到卽

先遣令馳往協剿

同日德楞泰奏言查霧渡河賊匪肆行侵擾衝

突卡隘

臣

等正擬督兵進剿適接汪新札稱賊

匪又分竄至當陽一帶勢甚猖獗官兵如由大

江直下即可迎頭截殺等語查楚北州縣兵守

空虛賊衆如至當陽遠安則荊州卽屬可虞如至

南漳則襄陽又受其蹂躪分兵進剿則力愈單

薄若一處合擊又恐不能兼顧隨商之明亮留

兵二千有餘於宜昌設法剿辦

臣

卽於十七日

帶兵三千餘名由水程漏夜趕至荊州可以繞

赴賊前迎擊十九日辰刻到荊與汪新會晤二

十日早帶兵前赴當陽探聞賊匪離當陽之宋

家壩地方僅四十餘里山勢險要先經汪新派

協領富清帶滿兵四百名并該縣汪雲銘帶鄉

勇千餘名駐彼防守臣於次日督兵前進並派

守備馬應國帶奮勇兵三十名前往探哨見賊

匪已向東北遠安一帶奔竄追拏活賊阮思宇

訛係賊匪遣來探信之人知遠安無兵現在賊

匪已分赴該縣圖據縣城即可進撲當陽當將

該犯正法又據遠安縣石燧稟報賊匪已擾至

縣境四十餘里之楊家坪爲數甚衆城內無兵

守禦請卽派兵分剿卽將宋家堽卡隘交協領

富清并該縣督率兵勇防守當飭副將長春扎

爾杭阿等先帶官兵一千名並派巴圖魯侍衛

阿納保等帶馬兵三十名飛赴遠安城內彈壓

堵剿臣同鎮臣達音泰等星夜帶兵馳往二十

四日黎明抵縣賊匪正在楊家坪一帶焚燒直

衝縣城臣督令達音泰巴圖魯侍衛溫春等帶

兵分兩路迎擊鎗礮並發相持數時之久賊匪
抵死抗拒擊斃賊匪百餘名賊始退據楊家坪
並於沿山拿卡綿長二十餘里時天已晚官兵
暫於蘆溪嶺駐紮各兵到齊卽行趕緊進攻務
期擒獲首逆再臣沿途見遠安居民扶老挈幼
紛紛逃徙情殊可憫現飭隨營道府等逐加安
撫并諭以大兵卽日到來小醜立可殲除爾等

正當秋穫之時毋得驚惶失業如此時將已熟
禾豆拋棄轉使賊人得計並繕示各處貼掛該
縣民人聞信欣然現在陸續復歸故土至南漳
兵守亦單現在王文雄帶領豫兵取道襄陽似
可卽令徑赴南漳防堵並可遏賊匪前赴襄陽
之路俟臣將遠安賊匪殲除卽行合擊更爲得
力

同日秦承恩奏言據差弁探稟楚匪由大寧巫
山分股奔竄一股折回雲陽開縣宜綿派令舒
亮穆克登布等帶兵遇其前惠齡恒瑞等帶兵
躡其後一股由巫山竄至歸州明亮德楞泰等
已順流帶兵趕剿另有一股由巫山攻擾興山
縣治隨竄入鄖陽府屬之保康界內經該縣鄉
勇截住復竄至房縣交界地方查房縣東接穀

城南漳可達襄樊西北由竹山竹谿可入陝境
上年春間竹谿竹山教匪蠢動恒瑞文圖等帶
兵收復其時巡防撫卹諸事皆臣就近經理略

悉地方情形現聞該處兵備無多汪新遠駐荆

宜劉君輔馬瑀等同赴川省勢難兼顧臣不敢

因係隔省稍分畛域當卽給發告示曉諭竹谿
竹山闔縣居民安撫人心並令該縣宗超海范

繼昌多募鄉勇防守卡隘又以竹谿官渡河等處與房縣地界毗連查有竹谿義首監生徐明衡明白曉事士民信服臣已飭令趕回官渡河一帶諄諭生員曾承選等鼓勵鄉勇堵禦巡邏以防竄逸

同日汪新奏言據保康房縣南漳興山東湖遠安當陽歸州馳稟賊匪分股肆竄各境到處焚

掠現在兵勇單弱請速調撥以資抵禦

臣查此

時賊勢紛亂省西各屬業已間被滋擾而兵力

有數無可分撥現在惟有飛飭各屬再行加集

鄉勇悉力堵截賊匪大勢總欲北趨襄陽東向

荊州查襄陽一路現有

臣前調之督撫標兵四

百名及南陽鎮兵五百名其王文雄所帶兵一

千餘名

臣

因南漳告急已飛咨該鎮順道進剿

兼有景安統兵駐境是襄陽附近可以無虞
躡荊州一路現在德楞泰擬由當陽移駐遠安
明亮卽由宜昌前往會合共兵六千有餘果能
訂定師期南北夾剿亦尙易於得手再臣前於
五月內請撥銀二百萬兩濟用此項餉銀到後
撥還截借黔餉銀四十萬兩又借動藩庫俸餉
銀五十萬兩又撥發應付額勒登保福寧一路

軍營糧餉及採辦馬匹募雇鄉勇採買米石等項統計現存不及三十萬兩此時賊氛肆擾在在需用仰懇

天恩勅撥銀三百萬兩以濟急需

同日河南南陽鎮總兵王文雄奏言

臣

帶領本

標兵一千名於七月二十二日戌刻馳抵襄陽據道員胡齊崙告稱明亮因東湖縣屬之霧渡

河有賊滋擾帶兵前往剿捕德楞泰亦由當陽
一路兜擊至賊匪前由興山竄入保康縣境該
縣楊開鏡督率鄉勇扼險堵禦遂向房縣奔逸
又有另股賊匪亦從歸州興山竄入保康界內
近逼南漳探得前後賊匪約共萬餘人現在保
康南漳交界之壽陽坪金斗坪歇馬河馬橋口
一帶滋擾查壽陽坪等處均信宿可達襄陽迤

下地既平行惟恐闌入豫境且南陽一帶並無
重兵臣不敢拘泥仍赴明亮等處協剿當由南
漳前進於保康南漳總要處所相機堵剿一面
知會明亮等夾擊以期迅速成功均奏入

上命軍機大臣傳諭宜綿明亮額勒登保德楞泰福
寧觀成惠齡景安泰承恩曰賊匪在南漳保康房
縣一帶滋擾現據王文雄奏約共萬餘人而該鎮

所帶之兵祇有一千餘名恐不敷剿捕目下山東
新調兵丁一千五百名及惠倫等所帶東三省官
兵景安竟當速帶赴保康南漳一帶幫同王文雄
剿賊至河北地方離賊較遠景安前請以直隸兵
丁駐紮河北之處竟可從緩莫若將此項官兵移
駐南陽一帶防守漢江北岸更足以資堵禦至德
楞泰於賊匪在楊家坪焚殺時卽督兵分路迎擊

所辦俱妥遠安無兵防守賊匪乘間竄入幸官兵
繞趕賊前迎頭截剿得以保護實爲可嘉德楞泰
著賞玉喜字牌大小荷包仍速將楊家坪賊匪上
緊攻剿並著明亮由宜昌一帶迅速剿辦卽行馳
赴遠安與德楞泰兩面夾擊再南漳賊匪約有萬
餘人此內脅從附和者自必不少一經官兵進剿
殲戮無遺朕心實有不忍若明降諭旨赦其脅從

之罪恐愚頑無知轉似因賊數衆多官兵難於剿
淨意在撫安並慮帶兵弁員因此遂懷觀望着傳
諭各路領兵大臣於臨陣剿賊時作爲已意明白
宣示以現調官兵數萬進剿賊匪旦夕殄平念伊
等被脅入夥本非得已今大兵臨剿法當悉予駢
誅姑爲伊等開一線生路准其自行投生如有臨
陣時拋去器械投順官軍者卽當赦其前罪概予

免死若能幫助官軍擒殺賊匪並當加以獎賞此
亦網開一面解散賊黨之法但宜綿等止當默存
諸心不可預行宣露致官兵心生懈弛又秦承恩因
興山賊匪竄往南漳保康一帶與竹谿竹山相近
密飭知縣宗超海等多募鄉勇並曉諭義民幫同
堵守自當如此辦理該撫惟當鎮靜彈壓勿使陝
省民人聞而驚疑爲要

上又命軍機大臣傳諭留京辦事王大臣曰汪新奏
請撥銀三百萬兩以資接濟湖北省軍務亟竣需
用正繁著照所請仍派怡親王儀郡王成親王慶
往傳齊在京前鋒統領護軍統領於內庫存貯銀
內再撥銀三百萬兩令直隸河南各督撫遴派妥
員分起迅速解往備用

初五日

辛丑

明亮奏言

臣

於十七日自歸州起行

舟次接據宜昌府王春煦稟報屯聚興山賊匪
於是日分股由楊家廟衝突霧渡河卡座勢將
進逼郡城又准汪新札知賊匪分股東竄闖入
東湖當陽遠安南漳各縣交界處所勢甚披猖
急須分頭堵截臣於是日趕到宜昌賊匪已至
大黃坪羅耳坪等處離城甚近居民紛紛逃避
當將城內現有兵丁先同文圖上城周閱分置

安設卽帶領員弁親至城外鎮境山相地擊營
分飭道員恒慶等安撫居民諭以隨同守禦各
保身家如果實力捍衛並可卽邀獎賞衆百姓
俱各踴躍徹夜巡守十八十九二十等日總兵
木騰額帶兵七百餘名都司張朋帶兵勇千餘
名都司馬元德守備馬濟帶屯土兵三百餘名
先後趕到臣一面督率於鎮境山茶庵二梁子

等處分設營卡一面飭都司應元寬張朋帶兵
勇二百名在咸池鋪設伏哨探二十二十一兩
日連獲放火賊人張會一等七名其大隊賊匪
自焚掠羅耳坪後卽在該處屯聚二十二日興
肇由歸州帶滿兵八百名繼至臣卽於二十三
日五鼓集兵千名分飭木騰額等東西兩路進
發臣帶兵三百名在東路蔡家河督率截殺興

肇帶兵三百名在西路白坪堵截策應木騰
額等帶領官兵同時並進賊匪分投抗拒愈集
愈多臣帶兵繼進並力轟擊與肇亦率領馬隊
直前衝突先後斃賊百餘名賊匪力不能支卽
由柴草河二虎坪一帶逃竄官兵乘勝追擊沿
途生擒蘇居朝等十七名訊係賊營戰手當卽
一一梟示是夜官兵卽在柴草河紮住夜間復

拏獲探信賊匪蘇士品薛力章二犯嚴加審訊
據供賊衆敗回後退屯荷花店地方初意本欲
攻得宜昌府城卽由水路進攻荊州今被官兵
遏住不敢前進要由普溪場抄宋家壩到當陽
等語別無要供亦卽正法臣竊計當陽一路有
德楞泰在彼兜截臣若由鎮境山普溪場前進
不特可絕賊人窺伺郡城之路並可兩面夾攻

臣

於二十五日卽同興肇將原帶滿漢官兵由

普溪場前至宋家垵沿途拏獲奸細供稱先有

一股賊人已竄至遠安其屯聚荷花店大隊之

賊因官兵在南面截剿竄聚遠安之包巾寨苟

家寨等處并探得德楞泰已由當陽前赴遠安

是當陽已可毋虞

臣

卽日帶兵由曹家垵木瓜

鋪趕至包巾寨一帶與德楞泰會籌夾擊奏入

上命軍機大臣傳諭明亮德楞泰景安曰賊匪分竄
荆且昨據德楞泰奏賊匪由楊家坪直撲遠安縣
城繞至賊前迎頭剿殺得有勝仗賊仍退回楊家
坪屯聚今明亮追剿宜昌屯聚之賊卽由普溪場
一路追擊此股賊匪亦竄往遠安之包巾寨苟家
寨等處是竄匪兩股歸併遠安明亮德楞泰正可
合籌夾擊務卽盡數殲除不可再有遲緩至南漳

一路賊匪與保康房縣之賊是否合而爲一抑仍
分路奔竄爲首之犯係屬何賊現在情形若何並
著景安迅卽加緊具奏

初六日壬寅宜綿惠齡奏言臣惠齡同恒瑞等由

干溪口一路進剿行至楊橋壩差探賊衆在田
家壩一帶焚搶其意欲與老木園賊人合夥臣

等督兵兼程於七月初二日馳抵放牛坡地方

距田家壩數里卽遇騎馬賊百餘人步行賊四
五百人執旗前來慶成富成六十七等帶領馬
兵衝突殺賊百餘名餘俱敗回

臣

惠齡恒瑞等

督兵乘勢分路抄截沿途殲斃二百餘人直至

田家壩復值賊衆三股各執黃白藍三色旗齊

來接應

臣

惠齡督兵佔住北面通大寧縣城之

山梁要路恒瑞慶成柯藩富成等帶領馬步隊

伍連環迎擊賊匪退上山梁亦放鎗礮抗拒數
次撲下皆被我兵鎗礮擊回惟山勢險狹仰攻
實爲費力署護軍叅領扎勒杭阿等均各下馬
率領奮勇兵丁首先攀援上山衝入賊隊與賊
短兵相接臣惠齡等督率侍衛將弁分路齊上
賊衆不能抵禦向西南敗走我兵追殺二十餘
里生擒活賊二百四十二名搶獲器械二百數

十件訊據活賊供稱賊衆本欲赴大寧焚掠今
被官兵截殺寶塔一帶地方又被官兵截住是

以俱向西南奔竄臣惠齡恒瑞等各帶弁兵於

十六日至雲陽縣之馬槽壩地方副都統銜六

十七巴圖魯章京佛寧等帶領馬兵在前哨採

至西牛壩兩山逼狹林木叢雜詎賊匪先於兩

旁埋伏候我馬隊臨近突然抄出六十七等奮

力衝突賊甚兇悍適慶成帶領巴圖魯侍衛巴
彥太江鼎等率領奮勇馬兵趕到併力衝擊巴
彥太江鼎各射死執旗賊目一人與六十七等
不避矢石往來衝殺伏賊始退臣惠齡督率富
成觀祥等帶領步隊自左邊山梁抄出恒瑞柯
藩督率副將李紹祖等自右邊山梁抄出三路
馬步弁兵乘勢直前追殺三十餘里至江口地

方一路殲賊甚多守備馬滿海千總馬洵馬渭
把總薛國相外委陳大榮殺賊尤多其大夥賊
人皆於溪河對岸排列吶喊施放鎗礮我兵涉
水逕渡賊衆見官兵追剿愈力隨向楓木嶺一
帶奔走該處本有竄匪分股屯紮是以彼此接
應時已向暮官兵卽於該處與賊對面紮住轟
擊十七日天甫黎明賊匪復分數股撲下我兵

亦預行準備擊斃賊匪三百餘人並有騎馬執
旗賊目三人中鎗墜跌賊匪不敢向前

臣

惠齡

恒瑞從正路進攻慶成柯藩等從旁截殺乘勢
搶上楓木嶺山梁追過大嶺直至升子溪賊匪
站立不住復向西面關口坪一帶奔竄奪獲賊
旗四十三桿鐵礮一位鳥鎗刀矛二百五十餘
件統計殺賊一千八百餘名擒獲四百餘名內

有新入賊夥之大小頭目楊玉元等七名訴以
各首逆去向供稱李全徐添德王三槐等自大
寧一帶被官兵截住現在欲由太平逃往陝西
又想起新寧東鄉等縣勾結夥黨並無一定去
向當將該犯等分別凌遲梟示西安防禦烏爾
恭阿於田家壩山梁殺賊陣亡其餘受傷陣亡
弁兵咨俟查明分別辦理其蒲家山賊匪經舒

亮穆克登阿等連日分兵攻擊凡有險要地方
俱經賊匪設卡抗拒我兵屢探路徑十八日舒
亮率領額爾成額等繞由祖師觀上山穆克登
阿帶領翼長富保等由曲馬過河上山兩面夾
擊_臣宜綿派令總兵索費英阿馳往策應是日
舒亮一上祖師觀見前面各山包俱有賊匪分
據卽督兵直前賊匪率衆抗拒毫無退怯我兵

鎗箭齊發隨剿隨進連奪山包四處搶據大嶺
坡陣亡守備盧應朝外委張秀賊衆卽退屯白
岩山地方我兵正在拏卡賊匪屢次衝突俱經
叅將姜敏功遊擊魏攀舉等奮力擊退斃賊二
三百人午後賊匪復率衆前來愈聚愈多守備
余德高把總陳榮殺賊陣亡遊擊魏攀舉身帶
矛傷一處我兵正在攬殺穆克登阿等過河連

搶瓦子坪賊卡二處趕來拔剿索費英阿帶兵
亦到分投擊殺賊始敗回計殺賊四百餘名生
擒三十二名餘衆仍在白岩山負險固守伏思
竄赴大寧一路賊匪逃至關口坪一帶屯劄該
處爲開縣太平東鄉三縣交界地方且距白岩
山城匪屯聚處所相近或乘間勾結或分股奔
竄均須妥爲布置惟查舒亮穆克登阿等一路

兵力似稍不敷刻下芭葉山竄匪已至長樂縣

境內離石砭較遠臣宜綿業經飛調烏什哈達

卽帶防石砭兵一千名並飭艾如文速撤防守

雲安場官兵會同舒亮等剿洗白岩山賊匪以

免牽制又派原任總兵楊秀帶兵一千名馳赴

開縣東鄉交界之雙河口堵截關口坪賊匪竄

路其太平一路雖先飭道員李鉉等團練鄉勇

分設卡隘第路徑叢雜現已飛飭柯藩酌帶官兵馳赴太平截剿並查賊衆旣已折回難保其不與方山坪之賊勾結合夥是新寧一路尤關

緊要適

臣

宜綿所調總兵富爾賽帶兵行抵軍

營卽率同馳赴開縣新寧交界之寶山關地方扼據險要居中策應再方山坪一路據朱射斗百祥稟稱官兵自十八九至二十一二等日搶

佔馬鞍山一帶分拏營卡進逼賊巢現在設法

攻剿

臣

宜綿仍飛飭該鎮等趕緊進攻再查明

亮德楞泰帶兵入楚所需軍火糧餉等項誠恐

該省一時預備不及現仍飭令川省源源運供

不敢稍分畛域統俟湖北派員接辦再行停止

同日汪新奏言日內南漳保康一路賊匪先經

各境鄉勇協力擊退嗣因官兵接踵前至賊匪

畏避已折向房縣境內當陽遠安一路賊匪紛
突無常目下德楞泰統兵移駐遠安之蘆溪嶺
明亮統兵前駐當陽之宋家壩兩相犄角其北
竄南漳之路復有大兵迎截賊匪勢必東向荆
門州一帶下竄該境爲數省文報通衢且與安
陸全郡接近兵守空虛臣已飛飭各集壯勇擇
要嚴防並調前駐東湖遊擊什圖所帶兵一百

五十名星赴該縣駐守一面飛咨明亮等相機
兜截其荆郡附近民情因賊氛漸逼未免驚惶
沙市商民間有挈家圖避者必須隨宜撫諭且
興山巴東等境屯聚未下之賊尙多若知荆郡
現有巡撫駐守或不敢卽生覬覦又各路軍營
糧餉軍火現俱由荆運濟亦必得臣親身嚴督
是目下情形實有未便卽赴襄郡之勢臣不敢

稍存拘泥再近據探報川省大寧賊匪現經官兵截殺復折回奉節一帶奔竄查此起賊匪既不能竄入竹谿竹山勢必復向巫山巴東等處伺間入楚歸州爲上游門戶若不留兵駐守誠恐明亮等統兵兜賊力難回顧而續來賊匪轉躡官兵之後臣已飛咨明亮等囑將與肇所帶之荊州滿營兵一千二百名全數留駐歸州臣

俟催到南省掣回之兵亦卽酌量撥帶前往再
適接當陽縣馳稟二十七日賊匪從洋坪繞入
縣境之呼兒總地方四散焚掠距城七十里勢
甚洶湧現於張王廟要路督勇防守等情臣查
洋坪地方卽係德枋泰紮營之蘆溪嶺對面乃
賊繞出官兵之後徑向當陽其意竟敢窺伺荆
州臣查由當陽至荊州惟河溶地方扼要適南

省掣回之兵已到有一百五十餘名臣卽先行

統帶前赴河洛督率該處紳勇迎頭堵截一面

飛咨明亮德楞泰迅卽分頭兜剿以免下竄滋

患均奏入

上命軍機大臣傳諭宜綿明亮德楞泰汪新曰宜綿
奏官兵剿殺竄赴大寧一路賊匪並進逼白岩山
情形所辦尙好此時賊匪奔竄不遑勢漸窮蹙宜

綿等務當乘其屯聚未定之時妥爲布置扼要截
擊擒拏首逆自無難尅期集事所有此次帶兵出
力人員著查明咨部議叙其陣亡之防禦烏爾恭
阿守備盧應朝余德高把總陳榮外委張秀等均
著咨部加等優卹又汪新奏當陽遠安一帶賊匪
紛突無常有明亮德楞泰兩面夾擊賊匪不敢前
至荊州恐其竄往荊門州一帶汪新不敢拘泥卽

赴襄陽所見俱是至所稱賊匪從洋坪繞入縣境
之呼兒總地方焚掠一節洋坪在德楞泰駐劄之
蘆溪嶺對面而明亮現在宋家壩互相犄角相距
均屬不遠想賊匪因聞官兵進剿又竄往呼兒總
地方未必果係繞至官兵之後明亮德楞泰等一
得此信自己追往兜剿不使賊至當陽滋擾明亮
德楞泰總當設法夾擊擒獲首逆爲要再據宜綿

奏大寧賊匪經官兵截殺向西南奔竄訊據獲犯
有徐添德王三槐等自大寧一帶被官兵截住欲
由太平逃往陝西又想赴東鄉等處勾結夥黨等
供大寧西南係夔州奉節地方陝西係大寧之西
北賊匪如欲逃往陝西斷無轉向南竄之理據汪
新奏探報大寧賊匪經官兵截殺折回奉節一帶
奔竄必復向巫山巴東等處伺間入楚等語可見

大寧竄匪亦思由姚之富等竄往湖北之路逃回楚省其獲犯所供逃回陝西之處竟係徐添德等令其捏詞誑供使官兵防範稍疎該犯等得以乘隙竄入楚省汪新請於歸州駐兵固爲預籌防堵起見但興肇所帶之荊州滿兵已抵明亮德楞泰軍營不便再令回歸州駐劄現在當陽遠安一帶正資兵力剿賊亦難再分況明亮德楞泰先將當

陽遠安之賊剿退即使大寧賊匪又竄至歸州亦正可迎頭截殺無須興肇帶兵前往歸州防堵也至河溶地方既係當陽荊州扼要之區汪新自應在彼駐劄現計湖南撤回頭起官兵自己到彼後起亦陸續可到如河溶地方尙須添兵防守汪新不妨於此內酌量留用其餘仍令速赴明亮等軍營助剿

初十日丙午額勒登保福寧奏言七月二十一日

官兵在腰帶巖下拏獲賊匪林有德周連開二
名逐加嚴訊據林有德供係林之華堂姪周連
開係該犯姊夫向在黃柏山任林之華起事卽
隨同到處打仗呼爲先鋒今家眷都在帽子山
林之華因官兵圍逼甚緊陳糧已盡新穀不能
養活多人急欲竄出令我等潛出探路並充作

難民探聽四川教匪信息沿途得信卽覓路趕回昨晚在腰帶巖用繩索繫下在包穀地內藏躲意欲偷上坡坎不料被獲該犯等於拏獲時俱受重傷當卽凌遲梟示將獲犯之兵量子獎賞伏思該匪被圍情急妄思竄逃自應趁此進剿設法生擒臣等察看各路懸崖陡壁過多艱於進取惟懷抱窩一處山勢雖陡路稍寬展隨

於附近營卡抽調官兵於二十三匹兩日督同
巴圖魯侍衛將領等節次仰攻賊匪捨命抗拒
男婦推墮滾木擗石我兵不能遽上而此一路
必須拏定營卡既可斷其下竄之路且官兵得
有憑藉庶攻剿較易臣等隨令官兵各攜帶土
囊木植於二十五日二鼓密上拏卡賊匪知覺
滾放擗石我兵奮力不顧接遞拏卡二處天甫

黎明賊匪聚衆攻撲被官兵奮力擊退鎗斃甚
多二十六日夜賊匪於昏黑中兩次潛撲蜈蚣
山一帶營卡經巡哨兵偵知密報副將皂保等
用石塊飛擊各營卡內齊用擗石推擲擊賊始
行潰散其張廷彥慶溥關騰各路據報節次用
鎗礮擊賊一二人至十數人不等然賊首一日
未得卽日殲賊衆亦屬無益

臣

等看得懷抱窩

一路兵力尙屬可施而賊匪可竄之路亦不外

乎此臣等於拏卡後層疊設有伏兵分派巴圖

魯侍衛更番管領勿令賊匪知覺一面相機攻

取一面設法誘其下坡以便截拏再新授建昌

鎮總兵富森布於十九日到營卽令管帶四川

現有官兵在大台山一帶堵剿

同日明亮德楞泰奏言臣德楞泰於遠安楊家

坪地方獲有勝仗二十五日各兵到齊次日黎明由舊縣茅坪西風埡進攻賊人吶喊迎前

臣

等帶兵搶上山梁併力轟擊將賊人頭二卡衝

開殺賊一百二十名生擒陳名揚劉秀坤等

十七名奪獲鎗矛木礮餘賊棄卡逃遁始向西

北一路狂奔官兵緊跟追擊復折向東北面洋

坪土地埡等處四圍

臣

德楞泰卽督兵由大小

港口跟蹤進擊一面飭將弁兵勇分投搜捕一

面飛咨明亮繞道向東兜截

臣

明亮是日同興

肇自宋家垭由遠安西面綠豆垭一路剿捕前

進沿途山溝林內搜獲匿賊劉會仁等四十六

名盤獲冒充鄉勇之奸細王文選等七名均係

潛探卡隘虛實之犯卽行正法行至大垭口地

方接德楞泰來信知遠安包巾寨楊家坪等處

俱經廓清賊人剿敗後向東北竄逸查遠安北
面洋坪土地埡緊連當陽呼兒總且與荊門州
接壤荊門爲荊襄適中之地關係緊要當卽取
道當陽小烟墩等處星夜遄發二十八日午刻

臣明亮行至溝溪河地方適臣德楞泰亦由武

雁山追趕到來兩路會合二十九日併力並進
於腰亭地方拏獲哨探賊匪甘廷秀等三名訊

據有欲折回當陽進窺荊州之語臣等以賊匪

屢經剿敗希圖往復竄擾不可不乘勝兜截八

月初一日官兵進至觀音寺賊人聞風退屯當

陽荊門州南漳交界之施家河東輦一帶查南

漳現有王文雄帶兵堵剿荊門州雖設有鄉勇

究不足恃臣等現已繞赴荊門州之西迎頭攔

截不獨該州可以保障卽當陽荊郡均能捍衛

若賊人繞出南漳北竄襄陽臣等亦得趕上兜

截斷不與賊以暇再查歸州爲楚蜀水陸門戶

誠恐川省雲萬一帶賊匪被剿情急復乘間入

楚是以前在歸州起行時曾商留興肇帶滿兵

八百名駐守嗣因前敵兵丁不敷興肇趕赴宜

昌協剿臣等酌商將後起滿兵五百名札飭協

領喜格管帶由夔巫趕赴歸州會同遊擊俞國

智所帶兵二百名設卡防堵均奏入

上命軍機大臣傳諭明亮額勒登保德楞泰福寧景
安曰此次額勒登保等在懷抱窩一路拏卡進逼
殺賊止數十人又未拏獲賊首可謂無能現在賊
匪糧食已盡官兵拏卡圍逼設法進攻速擒首逆
不可徒事空言至所稱設伏誘賊下坡以便截拏
自亦一計然亦須設計制勝若惟事拏卡圍逼又

因山路險峻難以仰攻豈有日復一日徒與賊相持之理至明亮德楞泰分投攻剿雖各得有勝仗但殺賊無多而賊匪仍向東北竄逸未能截住乃猶靦顏爲此虛詞具奏實爲伊等羞之至興肇旣抵明亮等軍營斷無復回歸州之理明亮等現今令協領喜格將後起官兵五百名留於歸州防守亦足以資堵禦再施家河一帶與南漳交界前因興

山賊匪分向南漳房縣一帶竄聚令王文雄帶兵
前往剿辦並令景安前往指示調度設施家河之
賊亦竄至南漳明亮德楞泰正可會同景安王文
雄等夾擊迅速蕝事

欽定剿平三省邪匪方略正編卷四十七

丁巳年

八月十一日

丁未

景安奏言初一日接據王文雄

來信南漳境之白虎頭一股賊匪近逼該縣該
鎮帶兵馳赴峽口堵截初二日又據襄陽府張
瑑稟稱賊匪近屯南漳之紫山坪一帶二十八
日僞退二十九日復倍道竄入該縣之陸坪地
勢渙散難以堵禦且分有三四股紛竄而前並

探得該處有旁路直達郡城等語

臣

查白虎頭

係遠安來路王文雄帶兵前往峽口係赴南路

堵截今據襄陽府所稟情形顯係賊匪探知王

文雄帶兵南向遂分股倍道北竄以爲乘虛窺

伺之計襄陽雖有官兵五百名祇可守城

臣

卽

囑總兵張文奇留兵四百名在光化穀城一帶

沿江駐防

臣

分兵三百名帶領馳赴樊城一面

將附近船隻提泊北岸一面督率本地鄉勇實力堵防初三日又接王文雄來信該鎮由紫山坪前進賊卽聞風退竄該鎮率同兵勇趕殺數十名拏獲活賊據供姚之富等自興山分起奔竄旋又分股在於保康房縣遠安等處焚掠南漳距襄樊甚近欲乘不備奔赴南漳北竄等供現在紫山坪賊匪退奔後由小道竄抵鞏峪仍

圖北竄該鎮已帶兵赴鞏峪堵截並據襄陽道
胡齊崙稟稱聞明將軍德都統從遠安後路追
剿而來可與王總兵兩面夾擊但遠安與南漳
連界山路處處可通若賊匪窮蹙旁竄可入荆
門鍾祥襄陽宜城等處王總兵一千名兵不能
處處分堵已稟請明將軍發兵由荆門麗陽宜
城方家堰而進庶不致賊匪四竄等語

臣

查賊

匪分股奔竄意在窺伺襄樊則北面最關緊要
此時楚省祇有王文雄所帶之一千名兵不敷
分截卽豫省邊境亦祇有

臣

與張文奇帶兵七

百名實難兼顧

臣

已於附近營分及守城兵內

抽調五百名前來分防惟漢江西自鄖陽東至

漢陽道路綿長現在江水漸落多有灘淺

臣

復

飛咨汪新嚴飭沿江各屬實力防堵並飛催前

西山東領兵將弁迅速兼程前來剿初五日
卯刻復據襄陽府稟報宜城鍾祥交界又有一
股賊匪竄擾查宜城在襄陽之東距郡城更近
且連驛路自應將此股賊匪先行剿除

臣所調

附近防守兵五百名兩三日內即可趕到俟惠

倫等到時將

臣

現帶兵內分撥五百名共一千

名交與惠倫等分帶前往南漳會合王文雄先

行分投截剿其襄江北岸有臣帶來之鄧州鄉

勇三千名派撥沿江一帶分段防守再數日前

臣已檄調駐防西路之北鎮兵五百名尙須數

日可到卽令總兵張文奇統入現帶之兵在襄

樊光穀一帶沿江往來巡防省城已有河標兵

五百名足資彈壓惟河北一帶兵備空虛所有

直隸官兵一千名仍請留五百名分駐河北一

帶以壯聲威

臣

卽赴襄陽俟兵到時相機剿辦

同日宜綿奏言

臣

率同總兵富爾賽二等侍衛

伊里布等馳至開縣東鄉交界之竇山關駐劄

策應各路隨飭舒亮穆克登阿百祥朱射斗等

督率將士趕緊攻剿並差探惠齡一路追剿賊

匪情形去後茲接惠齡知會連日官兵隨路搜

剿賊匪復由關口坪向前逃竄現在趕緊追躡

並派柯藩帶兵一千名馳往太平縣堵截又據
派防太平之道員李銓稟報探得賊匪業已竄
至太平縣屬渡口嚴焚掠騎馬者甚多行走迅
速該道會同叅將永明遊擊謝開先都司李廷
臣等分投竭力堵禦並保護縣治等情臣查太
平縣境處處與陝省毗連此次柯藩僅止帶兵
一千名堵剿仍屬不敷分撥遂於臣營及各處

監口抽調共得兵三千名派令富爾賽楊秀等
分起帶領由東鄉一路兼程趕往太平哨探賊
蹤設法會剿並查臣前調之肅州各標營兵三
千名正由漢中一路前來復飛飭帶兵將脩加
緊行走如能趕至西鄉紫陽一帶迎頭截擊更
爲得手再查川省被賊蹂躪地方仰沐

天恩分別賑恤其續又被賊之通江開縣萬縣雲陽

奉節巫山等縣

臣

復飭令該道府州縣查明被

擾村庄如距賊已遠先行設法招徠其賊匪未

靖處所卽就百姓逃避地方爲其搭蓋窩棚暫

資棲止一律米折兼放毋庸限以月分統俟復

業之後查照給賑三個月又各該州縣團聚鄉

勇間有因本地糧食爲賊匪搶掠者所給柴薪

之費未免不敷口食

臣

目睹拮据情形亦一併

酌給口糧用示體恤

同日蔡承恩奏言據竹山縣知縣范繼昌稟稱
賊匪在該縣之楊灘等處焚掠該縣齊集鄉勇
萬人堵禦殺死騎馬賊匪多人並據竹谿縣知
縣宗超海稟報亦已團練鄉勇萬人多係貧民
難於自備口食臣隨選派幹員攜帶銀二萬兩
兼恐該縣軍火不敷撥給火藥鉛丸礮位兼程

前往幫同辦理並查西安副都統豐伸布前帶
滿兵一千名在平利縣西南八仙河一帶防堵
大寧竄匪平利東北與竹谿毗連當卽札會豐
伸布帶領滿兵並撥給精壯鄉勇一千名徑赴
竹谿縣迎頭攔剿自更得力均奏入

上命軍機大臣傳諭宜綿明亮德楞泰惠齡景安曰
景安奏賊匪分股北竄爲窺伺襄陽之計而宜城

鍾祥交界又有一股賊匪竄擾此股賊匪或卽係
明亮等所追之賊宜城距襄陽更近此時自以剿
辦北竄之賊爲要景安現赴襄陽駐劄調度惠倫
阿哈保所帶東三省官兵已到景安復將所調兵
一千名交與惠倫等帶領前往南漳會合王文雄
截剿其山東山西官兵亦可陸續到來是北面一
帶已有官兵堵截而明亮德楞泰復自遠安荆門

州追剿而來兩面夾擊賊匪雖多亦無難悉數殲
除但此時賊匪分股奔竄首犯齊王氏姚之富是
否在明亮德楞泰所追賊匪之內抑或在王文雄
所追賊股之內總當探明首逆蹤跡併力擒獲又
秦承恩奏分途堵剿川楚賊匪情形所辦尙好至
竄往太平之賊已有惠齡恒瑞慶成柯藩等自南
兜剿又有新調甘肅各兵自北而來迎頭堵截諒

卷三十一 宣統元年 勅諭
不至於他竄著惠齡等務將各首犯上緊生擒不
可復令繞及陝境其白岩山竄匪及方山坪屯聚
之賊連日如何剿辦情形何以未據奏及著宜綸
督飭速辦毋再遲誤

上又命軍機大臣傳諭宜綸明亮額勒登保德楞泰
惠齡觀成景安等通來川楚各路賊匪奔竄官兵
分投剿捕日久不能蕲事推求其故總由統兵大

員漫無調度將官兵零星分撥處處堵截以致兵力分而見單正中賊計剿賊之法惟在整頓兵力擇要攻剿併力一處方可制勝若以賊匪分竄卽分兵追剿則賊多兵少處處轉爲牽掣卽如川省竄回湖北賊匪初祇兩股繼又分而爲四現據明亮德楞泰景安等奏襄陽宜昌各處賊匪於每股之中又各分多股東奔西竄而官兵惟事分路追

截不但打仗不能痛剿而尾賊奔馳兵力亦日形
疲乏適墮賊人奸計現在添調直隸山西山東官
兵合之吉林黑龍江勁旅已不下八千名以之整
隊剿賊自己裕如若於一二起到後卽行零星分
撥仍屬無濟著傳諭統兵大員咸知此意所有各
路新調之兵不可隨到隨撥務須全數齊集相度
機宜惟當探明首逆齊王氏姚之富現在何路卽

統領新兵專向此一路併力圍拏俟肅清一路再移師一路以次遞剿無難逐漸蕩平宜綿等無得仍踵前習各處分撥又復師老力疲被賊牽制久稽時日致干咎戾而負委任

臣等謹案兵貴精而不貴多遲速分合之間動中機宜兵家所以制勝也教匪本烏合之衆特因脅從者多一經官兵剿急二三首逆

卷之五十一
十一
奔竄靡常所在嘯聚蔓延各州縣希圖牽制
官兵而官兵分擊尾追兵力愈形單薄轉墮
賊人奸計不能剋日剋除蒙

皇上炳燭無遺

簡發東三省勁旅並調集近省官兵馳赴協剿

慮及帶兵大員或又零星分撥調度失宜

特中訓諭併力圍擊仰見

審略如神豈運籌決策者所能企及哉

十二日戊申王文雄奏言臣抵南漳後查該縣連

界之興山保康房縣一帶俱有賊匪滋擾當與

襄陽道胡齊崙會商於保康南漳總要之五盤

山駐紮遏賊北竄七月二十七日據該縣李芸

經探稟又有賊匪焚掠西南一路已至白虎頭

峽口等處當派弁兵留防五盤山臣卽帶兵馳

往剿殺賊匪數十人拏獲六名賊隨奔逸密籌
連日出沒不常見兵卽走明係引誘官兵以爲
牽制之計

臣

隨於西南扼要之峽口嚴防一面

四路偵探據報又有一股賊匪從遠安竄入南
漳之陸坪等處該處又在南漳東南與峽口東
西相距一百餘里亦可直達南漳縣城並旁通
宜城襄陽酌留弁兵帶同鄉勇堵禦隨於八月

初二日馳往三路迎擊當派遊擊賈永吉等帶
兵四百名前往柞峪守備鄭永泰等帶領兵勇
向辛家坪卽由中路報信坡前進初三日賊匪
擾至辛家坪相近之嚮水泉鄭永泰等率兵勇
迎敵殺賊一百餘人賊衆抄圍鄭永泰力竭陣
亡守備吳鎮州同俞克振奮勇相持臣聞報立
卽親率弁兵趕往迎擊賊匪隨退臣同守備哈

國隴等領兵追至羊角山山後又有賊匪搖旗
吶喊蜂擁而出官兵奮勇上前賊人直撲我兵
開放連環前面之賊應聲俱倒而後面賊匪皆
不畏死隨即前進中有騎馬一賊手執白旗左
右招呼當經武舉劉名焯箭射此賊落馬我兵
乘勢鎗矛直上賊始紛紛逃散我兵追壓十餘
里殺賊五百餘人生擒二十餘人奪獲大礮牛

馬器械甚多因天晚路歧不便窮追其另股賊
匪奔赴柞峪賈永吉奮勇殺賊陣亡經都司范
從志守備秦元貞等盡力抵殺將賊擊退初四
日臣正帶兵前進巡卡委員方潮盤獲探路奸

細訊出賊人明分暗合以數百從正路迎敵官
兵其大夥從東小路趨向縣城當經胡齊崙派
委州同銜董邦安義總甘宗羅等帶領鄉勇堵

禦正路

臣

當卽由北小路抄至百步梯地方扼

住險隘賊人不知此處伏兵恣意前來我兵鎗

礮並發擊斃無數賊人翻山越嶺而逃

臣

督率

哈國隴等分投剿殺二百餘人生擒十一人其

餘向東南一帶亡命奔竄守備富克錦奮勇趕

殺深入賊中被戕正路之賊亦經董邦安帶勇

擊退

臣

同胡齊崙訊據前後獲賊盧智等僉供

賊人分股滋擾總欲北竄其餘堅不供吐當卽
正法現在會同該道相機趕緊剿辦奏入

上命軍機大臣傳諭景安王文雄曰王文雄所帶兵
力無多此次打仗殲賊多名甚屬出力著賞金盒
玉搬指喜字牌大小荷包但閱摺內賊匪向東南
奔竄後王文雄如何帶兵追擊之處未據奏及仍
著景安查明王文雄如果實在奮勇以少擊衆卽

加恩賞給提督銜倚所奏情形或有未實亦著查
明據實具奏至射死騎馬賊匪之武舉劉名焯著
卽以千總拔補擊退賊匪之都司范從志守脩秦
元貞以應陞之缺陞用打仗陣亡之遊擊賈永吉
守備鄭永泰富克錦均著咨部加一等優恤並查
明該員等子嗣於服闋後送部引見所有此次打
仗受傷兵丁查明各賞一月錢糧又發去花翎五

校藍翎十枝著景安查明帶兵將弁及鄉勇等如有實在奮勇出力者傳旨分別賞給五六七品頂戴五品者賞戴花翎六七品者賞戴藍翎既可省遠路奏請之煩又可使在營將弁等倍加感奮各圖殺賊立功於軍務亦屬有益至賊匪東奔西竄其中必有主謀爲首之人此時齊王氏姚之富是否合爲一處抑或分路逃竄在何股內並著景安

查詢明確卽行具奏

十五日辛亥明亮德楞泰奏言臣等於初二日自

荆門觀音寺率兵進攻賊衆聞風由東鞏竄向

陸坪辛家坪七邱田腰盤寨等處查陸坪辛家

坪距荆門石橋驛甚近七邱田與鍾祥接壤腰

盤寨又離宜城不遠臣等察探賊情自宜昌遠

安剿敗之後一聞官兵信息卽行遁去欲使官

兵兼顧不暇以便乘間竄出萬一賊人擾及石
橋驛宜城等處不特驛站梗塞且大路平坦堵
剿更覺掣肘隨飭巴圖魯侍衛阿納保溫春等
帶領兵勇一千餘名繞道馳赴宜城縣城守禦
一面親率兵丁由姚家河仙居鄉留厚集一帶
前進以絕賊人竄往石橋驛來路詎賊人知石
橋驛一帶有備卽由腰盤寨武安堰直竄宜城

臣等探知星夜前進行至徐家集地方接據副

將劉廷基及該縣等稟稱初五日賊匪自腰盤

寨撲卡直入勢甚兇悍現離縣城約十餘里等

語臣等卽率同興肇達音泰等先帶馬隊兵丁

加緊進發爲掩襲之計遂由石灰窰小道繞至

江岸抄出縣城東北迎頭兜截其時賊人進逼

縣城相去祇五六里臣等趕上直前衝殺賊人

恃地勢平衍四路排列蜂擁前來希圖兜裹經
馬隊官兵擊射賊不敢進猶復施放鎗礮抵拒
相持一時之久後隊官兵趕到併力攪殺斃賊
三百餘名生擒李成貴等八名賊人狂奔敗走
官兵乘勝趕殺追至襄陽小河口幸張文奇先
將沿江船隻提赴對岸賊匪不能竄渡臣等帶
兵趕到時已向晚與賊人對面紮住連用鎗礮

轟擊擊斃甚多臣等正在運取火炬乘夜圍剿

三更時賊匪向北竄走官兵立即追擊至獨樹

塘地方天已將明適景安會同惠倫阿哈保等

帶領東三省勁旅前來合兵夾剿賊人志在直

奔襄郡經景安等自北而南攔截去路臣等在

南面擊殺賊人首尾不能相顧折向西南竄走

該處地勢四通八達惠倫阿哈保率領勁旅分

投抄擊賊衆披靡四竄捨命狂奔官兵益形趨
健追殺二十餘里殲戮賊匪五百餘名生擒周
明模李秀等三十一名餘賊向仙女山丁家集
一帶竄遁臣等因恐山徑崎嶇東三省兵丁不
便馳驟當令撤回此次兩面夾攻不獨荆門宜
城可保無虞亦不能衝犯襄陽再行北竄皆賴
聖明先事豫籌實足壯軍威而寒賊膽再查賊匪自

川省竄至歸巴一帶其初時分時合亦不能定

其股數_臣等先經獲賊訊據供齊王氏姚之富

卽在屯聚歸州一股賊內是以_臣等卽由歸州

宜昌遠安前來跟蹤兜剿邇日賊人分竄之路

雖有三股其實相隔皆不過百里內外連日獲

賊訊供仍僉稱齊王氏姚之富皆在此股賊內

但據保康房縣二處所獲賊供亦稱姚之富齊

王氏爲首三股賊匪所供逆首相同明係賊人
狡詐希欲惑亂官兵並有齊王氏尙在川省之
說其供詞均不足深信臣等細察情形知賊人
總思各回本處自川省竄回一股定係齊王氏
姚之富等而惠齡等在川省剿辦一股定係王
三槐徐添德等現已分飭各路確實查明再行
具奏

同日景安奏言

臣

於初五日由樊城來至襄陽

連日遣弁分路確探襄郡東西自南漳至宜城

一帶俱有賊匪分股焚掠爲數甚衆皆離郡城

不遠並聞王文雄初三日在南漳與賊接仗後

賊復遶過南漳分竄襄宜將王文雄阻隔在南

驛路亦被滋擾惠倫阿哈保卽欲帶兵出禦但

臣

與惠倫等所帶官兵僅五百餘名直隸山西

山東各省之兵尙未趕到襄陽本爲邪匪淵藪
據該府張瑤面稟郡城內難保必無餘孽民情
甚爲驚惶城守未便空虛且數百兵不足分截
數股之賊轉使賊匪窺知虛實臣當卽督率文
武鎮靜嚴防諒賊知臣與惠倫等在襄不敢直
犯惟查宜城縣亦係濱臨漢江江之東岸卽係
鍾祥豐樂河爲賊匪上年屯竄熟路急須防堵

一面知會張文奇於江北移師巡防一面派令同知噶爾炳阿帶同營弁馳赴宜城提禁船隻會同該縣招集鄉勇設卡嚴防適探知明亮德楞泰與肇等統領大兵自荊門宜城星夜兜截前來臣乘此機會先令惠倫阿哈保帶領馬隊由北抄截臣亦卽帶親隨馬兵一百名馳往策應兩路官兵奮力夾擊殲賊甚多賊匪敗向西

南入山竄臣等於獨樹塘與明亮等會合驛

路當卽廓清臣與明亮等熟商現在正當截剿

喫緊之時惠倫阿哈保所帶官兵自應隨同明

亮先行前進臣因直隸山西山東兵均尙未到

且賊匪出沒無常襄郡正須彈壓仍卽暫回郡

城駐劄察看何處緊要卽赴截剿均奏入

上命軍機大臣傳諭明亮德楞泰景安曰此次賊匪

自荆門直犯宜城若明亮德楞泰不能緊躡賊蹤
或致乘間紛擾宜城稍有疎虞則賊勢漸張今明
亮德楞泰並不予賊以暇自荆門星夜前進當賊
匪將至宜城之時繞道兜截得以痛加殲戮而景
安初抵襄陽時因兵力稍單若遽行輕進轉恐賊
匪窺知虛實是以持之鎮靜一聞明亮德楞泰帶
兵兜截卽率同惠倫阿哈保由北面奮擊輕重緩

急均合機宜賊匪經此番官兵兩面夾擊之後紛紛潰敗不獨宜城已保無虞卽襄陽亦可安堵所辦實屬可嘉明亮著賞給嵌珊瑚松石帶扣德楞泰著賞給雕象牙帶扣景安著賞給嵌松石帶扣並各賞玉搬指大小荷包與肇惠倫阿哈保王文雄等均爲出力著各賞玉搬指大小荷包達音泰木騰額張文奇胡齊崙著各賞大小荷包以示獎

勵現在賊匪入山竄逸扼險圍剿較平地尤易爲
力明亮德楞泰等總當督率官兵整隊進剿併力
圍截務將首逆拏獲則大局已定其餘分竄零星
賊匪自可不攻而潰矣

十七日癸丑明亮德楞泰景安奏言伏查教匪自

上年至今竄及數省雖各路剿殺爲數以千萬
計而首逆尙未成擒餘黨不形減少實緣該匪

等始尙據險屯聚猶得合圍進搗近日則東奔
西竄無久占之地無一定之所以劫掠爲生行
不必裹糧住不藉棚帳所過村庄市鎮人民多
被逼脅以致夥黨日多分股竄擾使官兵應接
不暇而楚北襄鄖荆宜各屬犬牙相錯道路叢
歧難以一一堵截至於官兵剿捕之法迎擊勝
於尾追兇擒勝於散逐

臣

明亮德楞泰前自巴

歸一帶前來如歸州宜昌遠安當陽宜城襄陽
各郡縣未嘗不繞赴賊前抄截但兵力以保城
爲急則村市已被焚掠以保荆襄爲急則保康
房縣各股已難兼顧更可恨者官兵探賊所向
窮日夜之力趕赴賊前而賊匪一見官兵非折
回返走亦必橫衝旁竄往往迎頭轉成擊尾官
兵若由後追殺則任其所之不能攔截若再欲

繞道抄殺則路遠兵疲卽幸而趕上難保賊人
不又他竄且官兵行走口糧軍火鍋帳器械均
須量爲裹帶逐日設卡拏營此皆賊人所無類
此情形剿辦驟難得手今計三股賊衆共二萬
有餘其中騎馬賊不下三四千_臣等現帶各兵
內馬隊不過六七百名其餘悉屬步兵今蒙

聖明洞察調撥吉林索倫兵三千名又發馬八千匹

竊思東三省勁旅若與尋常漢兵爲伍行走未能迅速無以逞其驍勇徒致兵乏馬疲莫若俟該兵丁到營後臣等再於健銳滿兵各省綠營官兵內挑出千名合之共得精銳馬隊四千餘名其屯土撒拉爾兵丁行走較捷亦酌量挑派以爲後隊接應分作四路臣等分投管帶晝夜進擊且額勒登保剿辦城子口賊匪卽日竣事

可趕抵臣等軍營將此項官兵交其帶領尤爲

得力該兵丁等壯健趨捷不獨慣於馳騁嫻習

鎗箭且能藉草爲宿炙肉爲飼可以不帶鍋帳

不待糧運實爲綠營漢兵所不能至現有各省

綠營兵及調到直隸山東山西兵丁分設四面

要隘以爲外圍更番戰守則各路不致空虛實

於堵剿大爲有裨臣景安現在籌辦肉乾炒米

等物以備進剿時分給裹帶計每兵每十日給以所需米肉攜帶亦不累重並令襄陽道府等照樣寬爲備辦源源接濟俾糧足馬強以便晝夜緊追截殺使賊匪眠食無暇定可次第掃除以收實效現在竄往南漳保康房縣等處之賊臣等鼓勵兵丁趕緊籌剿亦斷不敢稍有延挨再查原任廣西宣化縣知縣梁友穀係襄陽人

告病在籍因賊匪滋擾率同伊子文章梁印女
在程梢渡修築土堡收養男婦老幼鄉民十餘
萬並團聚鄉勇設卡防堵賊匪竄至該處梁友
穀父子率勇堵禦附近村莊未致被賊蹂躪洵
屬急公向義出力可嘉又襄陽武生梁大烈蔡
運陞武童蔡正陞張鳴來上年隨營出力經湖
廣督臣分別給與行營千把總外委頂戴該弁

等此次在程稍渡隨同梁印文堵禦賊匪亦屬出力又鄧州文生彭騰蛟自上年以來帶領鄉勇隨同堵剿實屬奮勉此次派令防守江岸亦能不辭勞瘁又探得房縣另股賊匪已由竹山向西奔竄距陝西紫陽平利一帶較近紫陽地方原派總兵富爾塞帶兵二千名駐劄防堵嗣經宜綿調赴川省以剿_臣等聞宜綿現調甘肅

官兵日內可到陝境已飛咨秦承恩於此次官兵內酌留一二千名在陝楚邊境擇要堵截其餘先令馳赴宜綿軍營聽候調遣奏入

上命軍機大臣傳諭明亮德楞泰景安秦承恩曰明亮等奏籌剿事宜所見亦是但明亮德楞泰前在四川帶兵剿賊由川追賊至楚且此次賊匪起自湖北明亮彼時亦在襄陽一帶與永保等統兵剿

殺迄今已隔年餘任賊東奔西竄官兵疲於追捕
墮其奸計是誰之咎今爲此奏未免已遲現在各
省兵丁早入豫境東三省勁旅計日亦可陸續到
楚著明亮德楞泰卽照所奏機宜悉心布置實力
攻剿務於一兩月間剋期蕩事但新兵未到之前
明亮等斷無坐待之理究竟目前作何進剿未據
奏及且賊匪自當阻遠安剿敗之後奔竄宜城經

明亮德楞泰由小路抄截景安同惠倫阿哈保復帶勁兵自北而來兩路夾擊賊匪卽竄南漳一帶山內藏匿該處山路在在可通設在一面駐兵堵守賊或從別路乘間他逸豈不予賊以暇愈去愈遠乎至房縣賊匪竄至竹山一帶前據秦承恩奏竹山竹谿各召募鄉勇萬餘名並令副都統豐伸布帶兵一千名前往堵剿今明亮等又咨會該撫

酌留肅州續調官兵擇要堵截倘此股賊匪向西
奔竄正可痛加截剿著秦承恩與豐伸布富爾賽
等彼此知會務將竹山竄匪併力堵截悉數殲除
勿令竄入陝境

上諭內閣曰明亮奏原任宣化令梁友穀因賊滋事
率同伊子梁印文團聚鄉勇奮力堵禦等語梁友
穀告病在籍因賊匪肆擾率同伊子悉力堵禦附

近村庄得以保全洵屬急公該員現已年老著加
恩將伊子梁印文賞給八品頂戴以縣丞卽用襄
陽武生梁大烈蔡運陞武童蔡正陞前經該督等
分別給予行營千總把總外委等銜此次幫同梁
印文堵禦賊匪亦屬出力著各該撫遇有缺出卽
行分別拔補其帶領鄉勇隨同剿賊之四川生員
彭騰蛟並著賞給八品職銜以示鼓勵

十八日甲寅汪新奏言臣前因荆襄迤東各境汛

守空虛密鄂輝姜晟據稱現派撫標等營兵

共一千五百名交長沙協副將滿倉統領由水

路陸續赴荆門州聽候調遣臣思南漳宜城等

處已有明亮德楞泰景安王文雄等分統官兵

會剿惟川省屯聚之賊有下竄入楚之勢昨准

文圖咨會已撥至巴巫交界現在歸州駐守各

兵共止八百名而要隘甚多未敷分撥又竹山
竹谿二邑貼近漢江現當水落灘淺易於偷渡
賊已分股擾及該境

臣

擬將湖南派來官兵以

一千名撥赴歸州交與文圖統領分撥各隘嚴
防以五百名撥赴竹山竹谿酌於濱漢要路駐
守以絕賊匪竄渡入豫之路至近日各境賊勢
據襄陽縣馳稟初七日南漳賊匪一股由丁家

集直竄縣境距城四十里一股竄至廣德寺距城二十五里宜城縣馳稟當陽遠安竄來縣境賊匪現在焚掠小河口向西狂竄南漳縣馳稟初七日賊匪擾至老觀廟折向黃連樹崗焚掠界牌頭武安堰等處宜城之路已被阻塞又據房縣馳稟南漳賊竄至縣境漫子山蜂擁衝卡經典史蔣大錫把總楊占魁率勇抵禦鎗斃騎

牛督戰賊婦一名殺死步騎賊匪多名生擒二
名訊據供稱騎牛賊婦係賊首高廷興妻室當
卽正法據竹山縣馳稟房縣賊匪竄及縣境秦
口地方卽率領鄉勇抵禦殺賊多名復竄至玉
口一帶焚掠又經鄉勇抵禦殺賊五六十人賊
卽竄渡鐵峪河先經鄉勇設伏截擊溺死無數
復殺斃一百餘人又據竹谿縣馳稟房縣賊匪

竄入縣境樊店河木瓜園等處經紳勇迎敵殺
賊三十餘人賊多勢盛請兵速援各等情

臣思

明亮德楞泰統領大兵現由宜城小河口前赴
獨樹店駐紮距襄甚近而景安又已帶兵駐守
襄郡日內自己兜剿得勝俟得信後卽行馳奏
奏入

上命軍機大臣傳諭明亮德楞泰汪新曰汪新所奏

情形尙未知明亮等剿散竄匪之信歸巴一帶爲
楚北上游而竹山竹谿亦有賊匪滋擾所謂湖南
之兵自應分撥防堵但宜城一帶賊匪竄入南漳
山內是否屯聚一處抑或又分股他竄明亮德楞
秦等如何設法截剿汪新駐劄適中之地得有信
息著卽據實速奏至賊匪竄至竹山竹谿縣境俱
被鄉勇抵禦將賊剿散殊爲可嘉其中必有一二

首先出力之人著詳悉查明據實奏聞請旨

十九日乙卯秦承恩奏言楚匪於八月初三日在

竹谿手巾店等處焚掠逼近縣城僅止數里適
豐伸布帶兵趕至賊匪不敢撲城由東路向北
奔竄經該縣宗超海密帶鄉勇乘夜截殺男婦
數人生擒十三人訊明欲由陝西仍回河南當
卽正法又經守備茹洪帶領兵勇截殺百餘人

賊匪由縣北繞至竹山沈家營地方屯聚距陝

省洵陽縣界數十里臣先已酌派兵勇於七里

關據險堵截賊匪不敢前進卽於初七日向東

竄至竹山鐵爐壩與陝省白河縣毗連臣亦已

酌派兵勇防守要隘惟前賊竄入竹山地方臣

雖督飭該縣知縣范繼昌屢次截殺未令近城

而湖北兵備甚單探聞房縣地方又有另股之

賊若不及早剿滅必致愈積愈多已飛札豐伸
布帶領兵勇取道趕赴竹山探明賊蹤盡力追
剿並飭溫承惠挑帶精銳鄉勇馳赴豐伸布一
路設法兜圍再前因川匪竄近太平與陝省西
鄉邊界毗連當派署鎮田有成道員文需帶領
兵丁多僱鄉勇分赴要隘嚴密防堵茲文需稟
報川匪於七月二十六日攻撲太平縣城經該

處兵勇奮力擊退二十七日午後有騎馬賊匪
徑撲西鄉秋波梁並放火焚燒坡下民房該道
得信馳往兵勇放鎗大張聲勢生擒探信賊匪
一名賊卽竄往太平後河一帶八月初一日申
刻賊匪又由太平青花溪竄至秋波梁下盧家
溝焚掠經文需會同田有成督率馳往堵禦賊
匪正在梁撲卡都司蘇維龍典史章榮基等帶

領兵勇迎頭截殺鎗斃箭傷五十餘人賊匪不能抵敵登時敗走追殺數里兵勇亦間有受傷因時已昏黑隨即撤回紮住梁上賊匪仍退至太平富家壩屯聚初四日賊匪竄至通江關壩一帶經恒瑞趕到截剿殺賊多人是夜亥刻賊匪遂竄至西鄉九元關潛行上撲意欲放火搶卡經守卡員弁兵勇用鎗礮擊退仍向西竄通

江境內現聞恒瑞惠齡慶成等俱已帶兵趕到
四面兜圍自可卽時撲滅奏入

上命軍機大臣傳諭惠齡恒瑞慶成秦承恩曰此次
楚匪由房縣向竹谿竹山等處奔竄經秦承恩令
豐伸布等帶領兵勇堵截殲斃多人其竄至太平
西鄉一帶川匪亦經秦承恩派令鎮道等奮力擊
退均不至闖入陝境所辦尙好其帶兵堵剿之文

武員弁著秦承恩查明如果始終勤奮咨部議敘
其有分外出力者卽行據實奏明候旨加恩至由
太平竄至通江關壩一帶之賊據奏現經恒瑞迎
頭截殺而惠齡慶成等亦帶兵趕到併力兜圍此
時惠齡等曾否將賊匪殲淨何以未據惠齡等具
奏伊等前次辦理竄匪惟事尾追以致賊匪四路
竄逸疲我兵力此次旣已趕上兜圍若再不合力

截剿又任賊匪他竄伊等自思當得何罪耶